

# 1 Jon

## Naloḅulat napisulan na-və<sup>ha-sual-an</sup> aJon totosi

Ase itos naloḅulat egai?

AJon tovi ahai susur siYesu, gai itosi.

AJon itos naloḅulat egai hən nəsa?

Itosi hən ɸeṽusan alat siYesu hən naṽide hən ləḅitoh, ɸon mai aGot mai nəvanuan tile gail.

AJon itos naloḅulat m̄os ase?

Itosi van hən alat lotokad nadələmian len aYesu Kristo len naut ɸisi.

AJon itos naloḅulat ɸais?

Hum ma totosi len nasihau A.D. 90.

1) Na-ke-ivoi-an (1.1-4)

2) Samteləmas naṽide tosa alat navile a pan lotokade. Mititoh tinor hən naṽusanan se-Nunun aGot, husur aGot ivoi ɸisi (1.5–2.27)

3) Datimasveveu buni, ləmas bun gidat gabag, riḅ gat nəlodato len aKristo. Datimasbunus kitev naṽusanan sihai ɸusan gail ke evi kitinan o eḅuer. Datḅigol ɸimagenan, datoləḅoi datḅehəḅaṽur len nəhon aKristo len natələmaman san (2.28–4.6)

4) Datimasləmas bun gidat gabag hən datḅeləḅoi ke datutoh len naṽide tonor hən nəboruan siGot. Datimasgol timagenan husur aNunun aGot ikel koti ke aYesu egəm hən datḅikad nəmauran vi sutuai (4.7–5.12)

5) Nə-maris-kotovi-an (5.13-21)

*Na-ke-ivoi-an*

1 Ginau notos nalobulat egai van hən gamito husur naSoruan hən nəmauran\* totoh tia len natubatan.\* Namtosəsəlon hən, namtorisi. Evoi, namtorisi hən namətanamito, namtubari hən navəlanamito. 2 AGot igol ke nəmauran tovisi, ale ginamit namtorisi, namtukel kot nakitinan husuri. Namtukel ur nəmauran vi sutuai mai gamito, nəmauran vi sutuai totoh mai aTata. Ale aTata igol tovisi hən ginamito.\* 3 Namtukel ur nəsa namttorisi mai nəsa namttosəsəlon hən mai gamito, hən gamit am mətḃeləboi mətḃikad naḃonan mai ginamito. Avil naḃonan sidato dattokade, datukade mai aTata mai aNatun tovi aYesu Kristo. 4 Namtutos natgalenan hən ləḃigol nəlonamito tepul səsəhov hən nakemkeman.

*AGot evi namial, toh len namial*

5 Ale egai evi napisulan namttosəsəlon hən len gai. Gai ikele ale namtukel uri mai gamito maiegai ke: aGot evi mial; səkad nəmargobut ideh lan. 6 Datḃikele ke dattokad naḃonan maii tia be datḃiyar len nəmargobut sal, datoliblibon, nəmauran sidato saḃusan nakitinan. 7 Avil datḃiyar len namial sunan aGot, totoh len namial, datukad naḃonan mai gidat gabag ale nəda hiYesu, aNatun, ekəkas gidato hən ḃilav kuv nəsaan sidato. Igol gidato datuveveu len nəhon.

8 Datḃikele ke datsəkad nəsaan ideh, datogəras gidat gabag, ale nakitinan eḃuer len gidato. 9 Be datḃikel vəhot nakitinan hən nəsaan sidato, dereh aGot terubat nəsaan sidato, tigol datuveveu dan

---

\* 1:1: Nəbon aJon tosor husur naSoruan hən nəmauran, isor husur aYesu Kristo. \* 1:1: Jon 1.1 \* 1:2: Jon 1.14

naŵide tosa p̄isi. Igol natgalenan husur ke akis igol n̄esa tokele, akis igol n̄esa tonor.\* <sup>10</sup> Datb̄ikele ke datsagol n̄esaan, datorin̄ n̄ehes len aGot ke tovi N̄evanuan Nalibliboŋan, ale nasoruan san ēbuer len n̄elodato.

## 2

<sup>1</sup> Tuhnaturgw gail len nad̄elomian, nutos natgalenan van h̄en gamito h̄en asike m̄at̄bigol n̄esaan. Avil gidat ideh b̄igol n̄esaan, datukad avan sua tosor m̄os gidato len n̄ehon aGot Tata, tous aTata h̄en b̄erūbat n̄esaan sidato, nah̄esan aYesu Kristo, gai tonor buni. <sup>2</sup> Gai etutumav h̄en n̄emaوران san gabag h̄en datb̄ikad narub̄atian dan n̄esaan sidato. Be savi gidato ŋai, igole m̄os alat navile a pan kavkav.\*

<sup>3</sup> Ale datel̄eboii ke datol̄eboi aGot m̄abe? Gidat datb̄igol n̄esa gai tokele, datol̄eboii. <sup>4</sup> Avan ideh b̄ike, “Nol̄eboi aGot, novi esan,” be sagol n̄esa aGot tokele, atenan evi n̄evanuan nalibliboŋan, ale nakitinan s̄apat lan. <sup>5</sup> Be gidat ideh dattogol n̄esa aGot tokele, len n̄elodat kavkav datol̄emas bun aGot. Len naŵide tomaien̄an datol̄eboi buni ke datutoh len gai. <sup>6</sup> Datb̄ikele ke datutoh tin len aGot, datimastoh husur naŵide aYesu tokade len n̄emaوران san.

### *Datimasl̄emas bun gidat gabag*

<sup>7</sup> Gamit notol̄emas bun gamit p̄isi, n̄esatos nakelean veveu todaŋ van h̄en gamito. Ao, evi nakelean todaŋ ta sutuai m̄attokade len natub̄atan. Nakelean egai todaŋ evi nasoruan m̄attos̄es̄eloŋ

---

\* **1:9:** Psa 32.1-5      \* **2:2:** Rom 3.25-26

həni tia.\* <sup>8</sup> Avil tarhəte, evi nakelean veveu todan nototosi gagai van hən gamito husur nakitinan han evisi len nəmauran seKristo, ale len nəmauran samito. Husur nəmargobut satovan vəmasig ale namial kitin etuʒat tia hən tomial.

<sup>9</sup> Gidat ideh bikele ke totoh len namial, avil bəmətahun bun nəbathudud nadəlomian ideh san, gai itoh sal len nəmargobut.\* <sup>10</sup> Avil gidat ideh bələmas bun nəbathudud nadəlomian ideh san, gai itoh tin len namial, ale səkad natideh len nəlon togol avan ideh bipes haʒetw, teh len nəsaan. <sup>11</sup> Be gidat ideh bəmətahun bun nəbathudud nadəlomian ideh san, gai itoh len nəmargobut, iyar len nəmargobut, ale etətan hən naut tovi lan, husur nəmargobut igol namətan iʒesw.

<sup>12</sup> Nutos nategai van hən gamit atuhnətugw gail, husur nəsaan samit gail lumaruʒat bathut nəsa aYesu togole mōs gamito.

<sup>13</sup> Nutos nategai van hən gamit atata gail, husur ke məttoləboi tia aKristo totoh tia len natuʒatan.\*

Nutos nategai van hən gamit nəmantuhmar gail, husur ke len nəbalañ mai atenan tosa vəsa tovi təmat, mətowin tia.

<sup>14</sup> Nutosi van hən gamit atuhnətugw gail, husur mətoləboi aTata.

Nutosi van hən gamit atata gail

husur mətoləboi tia ategaii totoh tia len natuʒatan.

Nutosi van hən gamit nəmantuhmar gail,

---

\* **2:7:** Jon 13.34    \* **2:9:** Len alat siYesu, galevis lokis galit gabag hən aKristen, be ləbəmətahun naKristen gail am, logəras galit gabag ke lotovi Kristen    \* **2:13:** Jon 1.1

husur mətudaŋ, mai nasoruan siGot ipat  
tabtab len gamito,

ale len nəbalan mai atenan tosa vəsa tovi  
təmat, mətowin tia.

<sup>15</sup> Samteləmas bun nañide sinavile a pan mai  
natit gail sinavile a pan. Husur mətbeləmas bun  
nañide mai natit gail sinavile a pan, mətəsaləmas  
bun aGot Tata. <sup>16</sup> Bathut natit p̄isi len nav-  
ile a pan, na-ləŋon-masuñ-həni-an hən nibemito,  
na-ləŋon-masuñ-həni-an hən namətamito, nañivan  
len na-pul-hən-natite-an, natgalen p̄isi ləsagəm len  
aTata, ao logəm len navile a pan egai tosa. <sup>17</sup> Ale  
navile a pan mai naləŋonian san gail lotosa, gagai  
ivan van vəmasig; avil avan ideh togol naləŋonian  
siGot, itoh tin van vi sutuai.

### *Aenemi seKristo gail*

<sup>18</sup> Anatugw gail, namityal naməkot hən navile  
a pan egəm pəpadaŋ. Mətosəsəloŋ həni tia ke  
avan sua tovi enemi seKristo dereh tegəmai, ale  
gagai nəvanuan tosoḅur lotovi enemi seKristo lo-  
visi tia. Husur natgalenan, datoləboii ke gagai evi  
namityal naməkot hən navile a pan.\* <sup>19</sup> Nəvanuan  
galenan luvan dan gidato dattovi siYesu, be ləsavi  
gidat ideh; husur lətavi gidat ideh, lətətah mai  
gidat sal. Be husur ke lotovan, eḅusani ke ləsavi  
gidat ideh.

<sup>20</sup> Avil gamito, aKristo eviol hən aNunun  
mai gamito ale gamit p̄isi mətəloḅoi nakitinan.  
<sup>21</sup> Mətunau ke nutos nategai van hən gamito husur  
ke mətəsaləboi nakitinan a? Ao. Nutosi husur ke

\* **2:18:** Mat 24.5, 23-24; Mak 13.21-22

məttoləboi nakitinan, məttoləboii ke naliboŋan ƣisi ləsagəm len nakitinan.

<sup>22</sup> Nəvanuan nalibliboŋan evi ase? Evi nəvanuan tomətahun b̄ike aYesu tovi aKriŋto, ikele ke aYesu savi aKriŋto, aGot sətəbtəbuh lan. Nəvanuan enan evi enemi seKriŋto, ike aGot savi aTata mai aYesu savi aNatun, emətahun gəlar ƣisi. <sup>23</sup> Avan ideh tomətahun aNatun aGot, gai sətah mai aTata am. Be avan ideh tokel uri ke tovi siNatun aGot, gai itah mai aTata am.\*

<sup>24</sup> Nəsa məttosəsəloŋ həni len natuβatan hən nəmauran məttokade len aKriŋto, mitimastəgau gati len nəlomito. Mətβətəgau gat nəsa məttosəsəloŋ həni len natuβatan, dereh gamit am mititoh tin len aNatun aGot mai aTata. <sup>25</sup> Ale ikel gat na-kel-gati-an egai ke: dereh tigol datikad nəmauran vi sutuai.

<sup>26</sup> Nutos natgalenan van hən gamito, nutos husur alat lotoke ləbēgəras gamito. <sup>27</sup> Be gamito, aYesu eviol hən aNunun aGot mai gamito, gai itoh tin len gamito gol ke mətsāmidol len nəpusanan ideh hən avan ideh am b̄evusan gamito. Evi aNunun aGot toṽusan gamito hən nakitinan husur natit ƣisi; nəsa toṽusan həni evi nakitinan, savi naliboŋan. Sum̄an ke toṽusan gamito, toh tin len aKriŋto.

<sup>28</sup> Evoi, anatugw gail len nadəlomian, mititoh tin len aKriŋto, hən ke nəboŋ b̄etəlmam asike datβikad nə-lon-uri-an, asike datβikad namətahwan, asike nahurudat b̄isa len nəhən. <sup>29</sup> Mətβeləboii ke aGot tonor, mətoləboii am ke nəvanuan ƣisi lotogol nanoran, nəpasian salito egəm len aGot.

---

\* **2:23:** Mat 11.27; Jon 5.23, 15.23

## 3

*Anatun aGot gail*

<sup>1</sup> Mäteris na-ləmas-buni-an aTata toviol masuŵ həni mai gidato, hən gai bəkis gidato hən anatun gail. Ekitin, datovi anatun aGot gail!\* Image-nan, nəvanuan navile a pan ləsaləboi gidato, bathut ke ləsaləboi aGot. <sup>2</sup> Gamit notoləmas bun gamit p̄isi, gidato datovi anatun aGot gail tia, be dereh dategəm sum̄an nəsa? Datsaləboi, savisi sal. Avil datoləboii ke nəboŋ aKristo b̄evisi, dereh date-sum̄an gai husur dereh dateris p̄ar p̄ar həni hum gai kitin. <sup>3</sup> Ale galit p̄isi lotokad nə-vatvat-viri-an hən ləberis maien həni, lotəgau gat tabtab hən naveveuan hən nəlolit gabag sum̄an ŋai aKristo toveveu.

<sup>4</sup> Avan ideh togol nəsaan ebur kotov nalo siGot husur nəsaan evi na-bur-kotov-nalo-an. <sup>5</sup> Ale mətoləboii ke aKristo evisi hən bilav kuv nəsaan gail. Mətoləboi gai səkad nəsaan ideh lan. <sup>6</sup> Nəvanuan p̄isi lototoh tin len gai ləsagolgol nəsaan; nəvanuan p̄isi lotogolgol nəsaan, ləsarisi boŋ ideh, ləsaləboii.

<sup>7</sup> Tuhnaturgw gail, avan ideh sategəras gamito. Nəvanuan togolgol nəsa tonor, inor, hum aKristo tonor; <sup>8</sup> avan ideh togolgol nəsaan, gai evi setəmat husur natəmat igolgol nəsaan len natuβatan van vəbar daməŋai. Bathut natenan, aNatun aGot evisi m̄os b̄emədas nauman gail setəmat hən ləbimasig.

<sup>9</sup> Nəvanuan p̄isi lotokad nəpasian salito len aGot, ləsagolgol nəsaan am husur nəboruan siGot ipat len nəlolito, iŵan hum namisurhuhai toŵan, gol

---

\* **3:1:** Jon 1.12

lodēdas lēbigol nēsaan bathut lukad nēpasian len aGot tolav nēmauran mai galito. <sup>10</sup> Anatun aGot gail lotile len anatun natēmat gail maiegai ke: nēvanuan p̄isi lēsagolgol nanoran, mai nēvanuan p̄isi lēsalamas bun nēbathudud nadēlomian ideh salito, lovi setēmat, lēsavi siGot.\*

<sup>11</sup> Imaienan, egai evi nasoruan mētōsēsēlon hēni len natubatan ke: datimaslēmas bun gidat gabag.\* <sup>12</sup> Sadatesumān aKen tovi sitenan tosa vēsa masuṽ tovi tēmat. Sadatesumān aKen, gai togol Apel, aṽan, tomat.\* Ale aKen igole imat sil nēsa? Igole bathut natgalenan aKen togole lusa vēsa, be natgalenan aṽan togole lunor.

<sup>13</sup> Imaienan bathudud nadēlomian, alat navile a pan lēbēmētahun bun gamito, samtesēhoṽut len na-mētahun-buni-an salito.\* <sup>14</sup> Datoḷēboii ke dattomakuv dan nēmatan vābis len nēmauran tia bathut ke dattolēmas bun nēbathudud nadēlomian.\* Avan ideh salēmas bun galito, gai sēmakuv dan nēmatan sal. <sup>15</sup> Galit ideh tomētahun bun nēbathudud nadēlomian ideh evi nēvanuan na-gol-nēmatan, ale hum mētōḷēboii, nēvanuan na-gol-nēmatan sēkad nēmauran vi sutuai lan. <sup>16</sup> Datoḷēboii tia ke na-lēmas-buni-an imaiegai ke: aYesu Kristo eviol kēmas hēn nēmauran san mōs gidato; imaienan, gidat māu, datehēhāṽur hēn datbēviol hēn nēmauran sidato mōs nēbathudud nadēlomian. <sup>17</sup> Avan ideh topul hēn natite sinavile a pan, toris nēbathudud nadēlomian ideh topar tit

---

\* **3:10:** Len alat siYesu, galevis lokis galit gabag hēn aKristen, be asike lēbēlēmas bun naKristen gail am, logēras galit gabag ke lotovi Kristen. \* **3:11:** Jon 13.34 \* **3:12:** Gen 4.1-8 \* **3:13:** Luk 6.22; Jon 15.18-19, 17.14 \* **3:14:** Jon 5.24



hən ħimaur lan, ale asike nəlon ħitanġisi, imabe? Gai ikad na-ləmas-buni-an siGot len nəlon a? Aoa!\*

<sup>18</sup> Tuhnaturgw gail, sadateləmas bun gidat gabag hən nasoruan o nəsa datġikele ħai, be dateləmas bun gidat gabag len nakitinan mai len nəsa datġigole. <sup>19</sup> Datġeləmas bun gidat gabag maienan, dereh dateləboii ke dattovi sinakitinan; dattovi siGot tovi nakitinan. Imaienan dereh nəlodat tikad natəmat len nəhon aGot, <sup>20</sup> naut kəmas nəlodat tokel mai gidat səbodat ke datimaspanis. Husur aGot esəhor masuŵ hən nəlodato, gai eləboi natit ħisi. <sup>21</sup> Gamit, notoləmas bun gamit ħisi, asike nəlodato səbodat ħikel mai gidat ke datġipanis, be nəlodat ħimasil, datukad na-il-ħuri-an hən datġeil len nəhon aGot. <sup>22</sup> Ale dereh aGot teviol hən natideh datġeusi həni, husur datugol nəsa gai tokele, datugol natit gail lotogol gai tohəhaŵur. <sup>23</sup> Ale nakelean todaŋ san ekəmaiegai ke: Datimaskad nadəlomian len nahəsan aNatun tovi aYesu Kristo, datimasriŋ nəlodato lan. Ale datimasləmas bun gidat gabag hən datġehusur nakelean todaŋ gai tokel mai gidato.\* <sup>24</sup> Alat lotogol nəsa aGot tokele, galit lutoh tin len gai, ale gai itoh tin len galito. Ale len aNunun gai toviol həni mai gidato, datoləboii ke gai itoh tin len gidato.

## 4

### *ANunun aGot o nanunun gəgəras?*

<sup>1</sup> Gamit, notoləmas bun gamit ħisi, samtedəlom nanunun ħisi, be mətebunus səhot gail ke lovi siGot

---

\* **3:17:** Deu 15.7-8      \* **3:23:** Jon 13.34, 15.12, 17

o ləsavi esan. Mitigol timaienan husur ahai kelkel ur gəgəras isoḅur lovi lan naut ḗisi len navile a pan.\* <sup>2</sup> Mətoləboi mətḅeləboii ke tovi aNunun aGot maiegai: ideh tokel uri ke aYesu Kristo egəm vi vanuan tokad niben, gai evi siGot, <sup>3</sup> wake ideh sakel uri, gai imabe? Gai savi siGot. Evi nanunun atenan tovi enemi seKristo tabtab. Mətosəsəloḅ həni ke atenan tovi enemi seKristo ḅegəmai, ale gagai itoh tia len navile a pan.

<sup>4</sup> Tuhnətuḡw gail, mətovi siGot ale mətosəhor ahai kelkel ur gəgəras galenan husur aNunun aGot totoḅ len gamito esəhor natəmat totoḅ len alat navile a pan.\* <sup>5</sup> Ahai kelkel ur gəgəras galenan lovi sinavile a pan, imaienan nasoran salito egəm len nənəuan sinavile a pan, ḡol ke navile a pan losəsəloḅ hən galito. <sup>6</sup> Be ginamito, namtovi siGot, ale alat lotoləboi aGot losəsəloḅ hən ginamito. Galevis ləsavi siGot. Galito, ləsəsəsəloḅ hən ginamito, lomətəhun ginamito. Husur natgalenan beti, datoləboi datḅeləboi səhot aNunun nakitinan mai nanunun nəgəgərasan.

*AGot evi na-ləmas-buni-an*

<sup>7</sup> Gamit, notoləmas bun gamit ḗisi, dateləmas bun gidat gabag tabtab bathut aGot evi nəkadun na-ləmas-buni-an. Gidat ideh toləmas bun ideh am maienan ikad nəpasian len aGot, eləboi aGot. <sup>8</sup> Gidat ideh asike ḅeləmas bun ideh am maienan, gai imabe? Gai saləboi aGot, bathut aGot evi na-ləmas-buni-an. <sup>9</sup> AGot eləmas masuḅ hən gidato. Eḅusan na-ləmas-buni-an san təban gidato maiegai

---

\* **4:1:** Deu 13.2-6    \* **4:4:** Len naut egai, nəḅoḅ toke, mətosəhor ahai kelkel ur gəgəras, namilen ke mətoil gəgat len nakitinan.

ke: esəvat aNatun ulumān tosua səḃon vi lan nav-ile a pan, hən, len gai, datḃikad nəmauran kitin.\*

<sup>10</sup> Na-ləmas-buni-an kitin evi nəsa? Mətunau ke evi na-ləmas-buni-an dattokade nəboŋ dattoləmas bun a Got a? Ao, savi enan. Na-ləmas-buni-an kitin evi na-ləmas-buni-an siGot toləmas bun gidato, tosəvat aNatun hən ḃetutumav hən nəmauran san gabag, hən ke, len gai, aGot ḃerubət nəsaan sidato gail dan gidato.\*

<sup>11</sup> Gamit, notoləmas bun gamit p̄isi, aGot ḃeləmas bun gidato len naḃide tomaienān, gidat māu datimasləmas bun gidat gabag. <sup>12</sup> Səkad avan ideh toris aGot boŋ ideh. Be datḃeləmas bun gidat gabag, aGot itoh tin len gidato gol ke na-ləmas-buni-an san len gidato isarpoh buni suḃān toləḃoni.\*

<sup>13</sup> Datunau ləboii ke dattotoh tin len aGot ale datunau ləboii ke gai totoh tin len gidato husur eviol hən aNunun mai gidato. <sup>14</sup> Ale namtorisi tia ke, namtukel koti ke aTata esəvat aNatun ulumān hən ḃilav kuv alat navile a pan dan nəsaan salito.\*

<sup>15</sup> Avan ideh tokel koti len nəhən nəvanuan gail ke aYesu tovi aNatun aGot, aGot itoh tin len avan enan ale avan en itoh tin len aGot. <sup>16</sup> Ale datoləboi tia na-ləmas-buni-an aGot tokade, toləmas bun gidat həni. Datorij nəlodato len na-ləmas-buni-an enan. AGot evi na-ləmas-buni-an, ale avan ideh totoh tin len na-ləmas-buni-an enan, gai itoh tin len aGot mai aGot itoh tin len gai.

<sup>17</sup> Husur natenān, aGot igol ke na-ləmas-buni-an san len gidato isarpoh buni suḃān toləḃoni, hən ke datḃikad na-il-ḃuri-an len nəhən nəboŋ

---

\* **4:9:** Jon 3.16    \* **4:10:** Rom 5.8, 10; 1Jon 2.2    \* **4:12:** Jon 1.18    \* **4:14:** Jon 3.17, 4.42

aGot b̄ep̄ep̄ehun navoian dan n̄esaan. Imaienan husur len natohan len navile a pan egai, datu-toh tin len aGot sum̄an aYesu totoh tin len aGot. <sup>18</sup> Nam̄etahwan eb̄uer len na-l̄emas-buni-an be na-l̄emas-buni-an kitin ehut nam̄etahwan, husur n̄ep̄anisman evi n̄ekadun nam̄etahwan. Avan ideh tom̄etahw len n̄ep̄anisman, na-l̄emas-buni-an siGot lan s̄esarpoh sum̄an aGot tol̄oḡoni.

<sup>19</sup> Datukad na-l̄emas-buni-an bathut a m̄o aGot el̄emas masūv h̄en gidato. <sup>20</sup> Avan ideh b̄ike, “N̄ol̄emas bun aGot,” be em̄etahun bun n̄ebathudud nad̄elomian ideh, gai evi n̄evanuan nalibliboḡan. Husur asike b̄el̄emas bun n̄ebathudud nad̄elomian ideh torisi tia, imabe el̄emas bun aGot gai sarisi? Sal̄eboi b̄igole. <sup>21</sup> Ale aGot ikel nategai h̄en gidato ke, avan ideh tol̄emas bun aGot, timasl̄emas bun n̄ebathudud nad̄elomian san tu.\*

## 5

### *Nad̄elomian len aYesu, aNatun aGot*

<sup>1</sup> N̄evanuan p̄isi lotod̄elomi ke aYesu evi aKristo, aGot totabtabuh lan, galit lukad n̄ep̄asian salito len aGot. Ale galit p̄isi lotol̄emas bun gai topasus, lol̄emas bun ideh tokad n̄ep̄asian lan am. <sup>2</sup> Datol̄eboii ke dattol̄emas bun anatun aGot gail n̄eboḡ dattol̄emas bun aGot, dattogol n̄esa tokele. <sup>3</sup> Bathut datb̄el̄emas bun aGot, dereh datigol n̄esa tokele. Ale natgalen tokel gail, l̄es̄edaḡ h̄en datb̄igol gail.\* <sup>4</sup> Husur galit p̄isi lotokad n̄ep̄asian len aGot, loil ḡegat dan nāvide tosa gail silat navile a pan, lowin. Nad̄elomian sidato evi n̄edaḡan h̄en

---

\* **4:21:** Mat 22.36-40; Mak 12.28-31; Luk 10.25-28      \* **5:3:** Jon 14.15

dattoil gəgat dan naŵide silat navile a pan. <sup>5</sup> Ase eləboi beil gəgat dan naŵide silat navile a pan? Nəvanuan todəłomi ŋai ke aYesu evi aNatun aGot.

<sup>6</sup> AYesu Kristo evi gai togəm hən bībaptais len nəwai mai hən nəda han biseł len nəmatan san. Len nəwai mai nəda egəmai.\* Savi nəwai hən nəbaptaisan san ŋai be nəwai enan mai nəda hən nəmatan san. Ale evi aNunun aGot tokel koti bathut ke aNunun aGot tovi nakitinan. <sup>7</sup> Husur itor enan lukel kot nakitinan,\* <sup>8</sup> aNunun aGot mai nəwai mai nəda; ale lototor lukel kot natit toṗitoṽ ŋai. <sup>9</sup> Len nakotan datodəłom na-kel-koti-an sinəvanuan, be nakitinan hən na-kel-koti-an siGot esəhori husur evi na-kel-koti-an aGot tokel koti husur aNatun ulumān. <sup>10</sup> Imaienan, alat lotoriŋ nəlolit len aNatun aGot lodəłom nəsa aGot tokel koti husur aNatun ale lukad nədəłomian enan len nəlolito. Avil alat ləsədəłom aGot ehum lotoke aGot tolibliboŋ husur ləsədəłom na-kel-koti-an aGot tokele husur aNatun ulumān. <sup>11</sup> Na-kel-koti-an imaiegai ke: aGot eviol hən nəmauran vi sutuai mai gidat tia ale nəkadun nəmauran enan evi aNatun ulumān. <sup>12</sup> Alat lotokad aNatun aGot len nəlolito, lukad nəmauran enan; ale alat ləsəkad aNatun ulumān aGot len nəlolito, lumabe? Ləsəkad nəmauran enan.\*

<sup>13</sup> Nutos natgalenan van hən gamit məttoriŋ nəlomito len nahəsən aNatun aGot hən mətbeləboii ke məttokad nəmauran vi sutuai. <sup>14</sup> Gidato, datsəkad nə-lon-uri-an len nəhon aGot ke, datbeusi hən natideh tonor hən naləŋonian san, dereh gai tesəsəlon hən gidato. <sup>15</sup> Ale datbeləboii ke tosəsəlon

---

\* **5:6:** Len nasoruan ta Kris, baptais səpat, ike nəwai ŋai ale nəvanuan namitisau hən nasoruan siGot lunau ke nəwai evi nəwai hən nəbaptaisan. \* **5:7:** Deu 19.15 \* **5:12:** Jon 3.36

hən natideh datousi həni, beti datoləboii ke eviol hən nəsa dattousi həni.

<sup>16</sup> Gəberis nəbathudud nadəlomian ideh togol nəsaan, be savi nəsaan togol tomakuv dan aGot, gisor tuṽ mōsi, ale dereh aGot teviol hən nəmauran kitin maii.† Nusor husur nəsaan savi nəsaan togol nəvanuan tomakuv dan aGot, be ikad nəsaan sua togol nəvanuan tomakuv dan aGot vi sutuai, ale nəsakele ke gisor tuṽ mōs galit lotogol enan.

<sup>17</sup> Natit p̄isi ləsanor lovi nəsaan, be ikad nəsaan galevis ləsagol nəmatan, ləsagol ke nəvanuan tomakuv dan aGot vi sutuai.

<sup>18</sup> Datoləboii ke nəvanuan p̄isi lotokad nəpasian salit len aGot, ləsagolgol nəsaan husur aNatun aGot ihavhav hən galito, etəgau gol galito hən gai tosa vəsa masuṽ tovi təmat b̄edədas b̄ibar galito.

<sup>19</sup> Datoləboii ke datovi siGot naut kəmas ke galit am lotosuh len navile a pan lutoh len navəlan gai tosa vəsa tovi təmat. <sup>20</sup> Ale datoləboii ke aNatun aGot togəm tia ale eviol hən naləboian hən datb̄eləboi aGot kitin, ale datutoh tin len aGot kitin, datutoh tin len aNatun ulum̄an, aYesu Kristo. Atenan evi aGot kitin, evi nəmauran vi sutuai.

<sup>21</sup> Bathut enan, anatugw gail len nadəlomian, mətələləgau hən gamito dan nagot gəgəras gail.

---

† **5:16:** Nəsaan togol nəvanuan tomakuv dan aGot evi nəsaan togol nəvanuan tomat vi sutuai.

**Nasoruan siGot len nasoruan ta Uluveu**  
**The New Testament in the Maskelynes language of**  
**Uluveu, Vanuatu**  
**Niutestamen long lanwis Maskelynes blong Uluveu,**  
**Vanuatu.**  
**Le Nouveau Testament dans la langue Maskelynes de**  
**Uluveu, Vanuatu.**

copyright © 2013 Wycliffe Bible Translators, Inc.

Language: Maskelynes

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files dated 9 Oct 2020

cb9da196-fced-5a7c-9540-74db5e4270fd